

Kapiya Sën Jon Kevu Muginsën Vu Kerisi-yi-alam

Gagek Mala-tumsën-yi

¹ Ngaa sënë og yö nedo vu nyëmuğinsën. Lob he hango los halë rak malamin. Gehe hetung malamin rak gehe hebë nemamin rak meparah. Ngaa sën he nanër gagek rak agi, og yik yi mehö sën tu Gagek sën nevong behil nado malad-tumsën lo. ² Lob Mehö mala-tumsën-yi sagi tu mehönon rak, betök yam rangah, behe halë yi. Lob he nanër gagek yönon sënë rangah, banër vu ham bë nedo mala-tumsën degwata los degwata ving Ama. Rëk tu mehönon rak behe halë yi rak malamin. ³ Ngaa sën he halë los hango ggovek lo, sën he nanër rangah vu ham ving, in bë hil nid ga jak hil nabë sën he los Ama luho Nalu Yesu Kerisi nimin negga rak he agi. ⁴ Lob he kevü gagek sënë yök vu ham in bë hil ahëd nivesa rot gemaggin pin nama.

Hil Ana Jak Rangah

⁵ Lob gagek sën he hango banër rangah vu ham lo, yik nebë sënë: Anutu nesepa loğ ngaa rangah-yi mu, gağ ngaa malakenu-yi teka su neggëp vu yi rë. ⁶ Bë hil nanër nabë, “Alu Anutu nimin negga rak he”, rëk mu hil nesepa loğ ngaa malakenu-yi, og hil nehekuung rak, gağ hil su nesepa loğ gagek anon rë. ⁷ Gağ bë hil medo jak ngaa rangah-yi nabë sën yö nedo rak ngaa rangah-yi vorot lo, og hil nid negga rak hil vewen vewen, lob Anutu

Nalu Yesu nikök yö medo neripek hil ngaa nipaya pin ya, gehil nid vesa nerak. ⁸ Bë hil nanër nabë, “Sak su nehevong ngaa nipaya rë”, og sagak hil ngo netetuhin ayod meris mu, gak gagek anon su nare lok hil ayod rë. ⁹ Rëk mu nabë hil nanër hil ngaa nipaya rangah vu yi, og rëk kevoh na, in yi og su nepekwë yi rë. Gak yö nevong ngaa yohvu mu, om rëk jevu ngaa nipaya pin na in hil ayod gehil medo nid vesa. ¹⁰ Anutu nër bë hil pin nehevong ngaa nipaya, om nabë hil nanër nabë, “Sak su nehevong ngaa nipaya ti rë”, og sënë nebë hil nemehoo yi gagek, benanër yah rak yi bë yi mehö gagek tetuhinsën, log yi gagek su neggëp lok hil ayod rë.

2

Kerisi Og Hil Mehö Sën Nelok Vu Hil

¹ Nalug lo, sa nekevu kapiya sënë yök vu ham in bë ham su gwevong ngaa nipaya. Gak nabë mehöti gevong ngaa nipaya, og hil Mehö sën nelok vu hil menenër hil gagek lo nedo ving Ama. Mehö sënë og yik mehö yohvu Yesu Kerisi. ² Yö diik lok yah hil bed in bë kevoh hil ngaa nipaya na begagek ahë yes jak in hil. Rëk mu su nevong huk sagi in bë dok vu hil mu rë, gak nevong in bë dok vu alam pin sën denedo yoh vu dob pin agi geving. ³ Nabë hil nesepa lok Anutu yi horek, og hil ajak ni nabë hil narak yi ni. ⁴ Log nabë mehöti nanër nabë nerak Anutu ni, rëk mu su nesepa lok Anutu yi horek rë, og yi mehö gagek kuungsën ala, gak gagek anon su neggëp lok ayo rë. ⁵⁻⁶ Gak nabë mehöti sepa dok Anutu yi gagek, og saga tato bë nesepa lok Anutu

yi aggata ahëvingsën-yi yönon rot. Log mehöti sën nenër bë luho Anutu denedo revuh ti lo, og gevong ngaa pin noh vu sën Kerisi nevang lo, in mëm hil ajaḱ ni nabë luho Anutu denedo loḱ ti yönon.

Mehöti Sën Ahë Neving Ari Lo Lo, Og Nedo Raḱ Rangah

⁷ O sa mehö lo-e! Horek sën sa ḱevu vu ham-ë, og su mewis rë, gaḱ yik horek muḱeng sën yik yöḱ vu ham wirek lo. Horek muḱeng saga yik ḱageḱ sën ham ngo nyëdahis lo. ⁸ Rëḱ horek sën sa ḱevu vu ham agi, og horek mewis. In Kerisi yam nedo dob, lob sepa loḱ horek sagi beneggëp rangah, log ham nesepa loḱ ving. In malakenu maya geheng ya, berangah anon to dob beneggëp ya. ⁹ Log nabë mehöti nanër nabë nedo raḱ rangah, rëḱ mu nelë ari paya, og mehö saga yö nahën nesepa loḱ ngaa malakenu-yi. ¹⁰ Gaḱ mehöti sën ahë neving ari lo, og nedo raḱ rangah, om ngaa ti su rëḱ gevong mebës rë. ¹¹ Gaḱ mehöti sën nelë ari paya lo, og nesepa loḱ ngaa malakenu-yi. Nesepa loḱ ngaa malakenu-yi om neketul loḱ in aggata niröp, in ngaa malakenu-yi sënë neggërin mala.

¹² in Anutu kevoh ham ngaa nipaya ya raḱ Kerisi arë.

¹³ Log ham alam hib, sa neḱevu ḱageḱ sënë yöḱ vu ham,

in ham raḱ Mehö sën yö nedo wirek rot menedo gwëbeng agi degwa ni.

Gesa neḱevu ḱageḱ sagi yöḱ vu ham hur maḱëm sën ham kwesuu Mehö Nipaya Satan ggoveḱ ya lo ving.

¹⁴ Sa neḱevu ḱageḱ yöḱ vu ham hurmahen

in ham raḵ Amamin vu yaḡek ni nivesa.
 Log sa neḡevu ḡaḡek saḡi yök vu ham alam hib
 in ham raḵ Mehö sën yö nedo vu wirek rot
 benedo ḡwëbeng aḡi degwa ni.
 Gesa neḡevu ḡaḡek sënë yök vu ham hur maḡëm,
 in ham hur maḡëm los nimin wëëk,
 lob Anutu yi ḡaḡek negḡëp loḵ ham ayomin
 beham kwesuu Mehö Nipaya Satan ḡgovek
 ya.

Hil Su Ahëd Geving Aggata-dob-yi

¹⁵ Ham su ahëmin geving aggata-dob-yi los ngaa-dob-yi pin. Nabë mehöti ahë geving aggata-dob-yi rot, og su yoh vu bë ahë geving Ama vu yaḡek rë. ¹⁶ In hil araḵ ngaa-dob-yi pin saḡi ni bë ngaa sën hil navid nevongin lo, gengaa sën hil malad anon in lo, gengaa sën hil nehako hil raḵ in lo, og su yam vu hil Amad Anutu rë. Ḡaḵ yö verup raḵ aggata-dob-yi. ¹⁷ Rëḵ mu ngaa-dob-yi los ngaa sën hil malad anon in vu dob lo pin, og rëḵ mala nama na. Ḡaḵ mehöti bë sepa doḵ Anutu aye, og rëḵ medo degwata.

Alam Sën Denelë Yesu Paya Lo Deverup

¹⁸ Naluḡ lo-e! Ḡwëbeng og hil verup loḵ buk sën dob vongin govek na lo. Wirek og ham ngo ḡaḡek bë mehö sën nevongin bë dahun Kerisi na lo rëḵ berup. Lob ḡwëbeng og alam ngahi nebë saga detök yam rangah ḡgovek ya, om hil araḵ ni bë buk dus raḵ bevongin govek na. ¹⁹ Alam sën bë dedahun Kerisi na aga, og yik sir Kerisi-yi-alam nebë hil. Rëḵ dekehe sir vër in hil, om su hil alam sir niröp rë. Ḡaḵ bë hil alam sir niröp, og rëḵ demedo geving hil rot. Rëḵ ma gedevuu hil ya,

om hil arak ni niröp bë su hil alam sir rë. ²⁰ Rëk mu Kerisi vong Anon Vabuung yök nedo ving ham, om ham pin rak gagek anon ni. ²¹ Sa su nekevu gagek sagi yök vu ham in bë mak ham dugin gagek anon rë! Gak sa nekevu in ham rak gagek anon ni vorot geham rak ni bë gagek anon og su nenër gagek kuungsën ti verup lok rë. ²² Mehö re gagek kuungsën ala? Gak yik mehö sën nelah Kerisi vun bë su yi mehö sën Anutu ggooin rak in bë geko hil nah rë lo. Mehö saga og yik mehö sën nevong in bë dahun Kerisi na lo, lob neruu demi vu Nalu gevu Ama ving. ²³ Mehöti bë geruu demi vu Nalu, og su Ama yi alam yi rë. Gak mehöti sën nenër rangah bë nevong ving Nalu lo, og Ama yi alam yi ving.

Anon Vabuung Netahu Hil Lok Gagek Anon

²⁴ Gagek sën ham ngo wirek mugin lo, og ham ngo najom ahon. Nabë ham najom gagek sën ham ngo mugin lo ahon, og ham los Ama lu Nalu rëk medo jevuh ti. ²⁵ Lob nër gagek vu hil benare vorot bë rëk gevong behil medo malad-tumsën degwata los degwata. ²⁶ Sa nekevu gagek sënë yök vu ham in bë nanër alam sën vongin degekuung in ham aga tato vu ham. ²⁷ Rëk mu ham ko Anon Vabuung vu Kerisi ggovek ya benahën nedo ving ham. Om ham su nesero mehö ngwë in bë tatekin gagek vu ham rë, gak Anon Vabuung yö netatekin ngaa pin vu ham. Lob Anon Vabuung yi gagek og gagek anon, gak su gagek kuungsën rë, om ham najom gagek sën netatekin vu ham lo ahon begwa jak Kerisi.

²⁸ Yönon, nalug lo! Ham ngo gwa jak yi rot, lok mëm vu tamusën sën natök nom rangah lo, og hil

bare nid wëek los kwad vesa dok buk saga, gaḵ hil su agöneng in yi. ²⁹Ham neraḵ Kerisi ni bë yi mehö yohvu, om ham jaḵ sënë ni geving nabë alam sën denevong ngaa yohvu lo, og detu Anutu nalu.

3

Gwëbeng Hil Atu Anutu Nalu Lo

¹Alam-e! Ham kwamin bo nabë hil Amad Anutu ahë neving hil pangsen rot, om sën nenër hil bë nalu hil lob sagaḵ yönon-Anutu nalu hil. Rëḵ alam sën denesepa loḵ aggata-dob-yi lo, og su derak sënë degwa ni rë, in sir dugin Anutu.

²Sa mehö lo-e! Gwëbeng sënë hil atu Anutu nalu, rëḵ hil dugin sën hil rëḵ nid nabë lo, in Anutu su tatekin meneggëp rangah rë. Gaḵ hil arak ni bë tamusën, sën Yesu rëḵ natök nom rangah gökin lo, og hil rëḵ nid nabë yi, in hil rëḵ galë anon sogek.

³Log alam pin sën denevo kwaj in gagek sagi bë anon jaḵ lo, og yö denegin sir bedenevongin bë denatu mehönon nijvesa rot nabë sën mehö nivesa Kerisi. ⁴Gaḵ alam pin sën denevong ngaa nipaya lo, og denekeyëh horek, in ngaa nipaya og yik ngaa sën nekeyëh Anutu yi horek. ⁵Lob ham rak ni bë Yesu og ngaa nipaya ti su neggëp vu yi rë, gaḵ töḵ yam rangah in bë geḵo hil ngaa nipaya nyëvewen vër in hil. ⁶Mehöti sën negga rak yi lo, og su nesepa loḵ ngaa nipaya rë. Gaḵ mehöti sën nesepa loḵ ngaa nipaya yi aggata lo, og hil narak ni bë su nelë Kerisi rë, gesu neraḵ Kerisi ni rë.

⁷Oo sa hur mahen lo! Ham gwegin ham in mehöti rëḵ tetuhin ham. Mehö sën yö nevong ngaa yohvu lo, og yi mehö yohvu nebë sën mehö yohvu

Kerisi. ⁸ Satan ko ngaa nipaya rak nyemuginsen bemedo nesepa lok, om mehöti sen nesepa lok ngaa nipaya lo, og Satan yi alam yi. Rëk mu Anutu Nalu tok yam rangah in bë basap Satan gekevoh yi huk na. ⁹ Mehö sen tu Anutu nalu lo, og su nesepa lok ngaa nipaya rë. Gaq Anutu vong beni nebë yi, om su yoh vu bë sepa dok ngaa nipaya rë, in tu Anutu nalu. ¹⁰ Nabë hil nehevongin bë ajaq Anutu nalu lo nij, gajaq Satan nalu lo nij, og hil ajaq nij nabë sënë: Alam sen su denevong ngaa nivesa rë lo, og su Anutu-yi-alam sir rë. Log alam sen su ahëj neving arij lo rë lo, og su Anutu nalu sir ving rë.

Aggata Sogek Sën Hil Ahöd Geving Arid Lo Lo Nebë Sënë

¹¹ Ham ngo gagek sënë vu nyëdahis beyam bë: Hil ahöd geving hil vewen vewen. ¹² Hil su gevong ngaa nabë Kain. In Satan yi mehö yi, om sën sis ari mediik. Sis ari mediik degwa rak va? Degwa nebë yi mehö nesepa lok aggata nipaya, gari nesepa lok aggata niröpsen-yi.

¹³ Arig lo! Nabë alam sën denesepa lok aggata-dob-yi lo sënë degelë ham paya, og ham su gwelëk mejanga nemamin in ngaa saga. ¹⁴ Hil ahöd neving arid lo, om hil araq ni rak sënë bë: Hil hevu sën hil nadiik na verök yi lo ya, gatök yam sën hil medo malad-tumsen degwata lo. Gaq mehöti sën su ahë neving ari lo rë lo, og yö nahën nedo lok diiksën. ¹⁵ Mehöti sën nelë ari paya lo, og sënë nipaya böpata rot nebë sën sis yi mediik. Lob ham rak ni bë alam sën denesis mehönon medenediik lo, og mala-tumsen sën gevong behil medo degwata los degwata lo su neggëp vu sir rë. ¹⁶ Yesu

diik loḵ yah hil bed in bē doḵ vu hil, lob hil arak ahēvingsēn anon degwa ni rak sēnē. Om yik hil geving. Hil dahun hil badok vu arid lo nabē saga, genabē hil nadiik og yik ggovek. ¹⁷ Rēḵ mu nabē mehōti yi ngaa dob sēnē neggēp, lob lē gari ti rak vu in ngaa ti, rēḵ ruu demi vu ari sēnē, gesu loḵ vu yi rak yi ngaa rē, loḵ nenēr bē ahē neving Anutu in va?

¹⁸ Oo sa hurmahen lo, hil su ahēd geving arid lo jak vengwēngsēn los avid meris mu, gaḵ hil ahēd geving sir yōnon begevong huk madok vu sir.

Alam Sēn Denevong Ving Anutu Lo, Og Su Deneggöneng In Mala Rē

¹⁹ Nabē hil gevong nabē saga, og rēḵ tato vu hil nabē: Hil nesepa loḵ gāgek anon yōnon, genabē hil ayod neggēp nivesa, om hil su rēḵ agöneng in Anutu mala rē. ²⁰ Gaḵ nabē hil ayod nanēr hil nabē hil nehevong ngaa nipaya, og hil kwad bo nabē Anutu og bōpata kesuu hil ayod menerak ngaa pin ni los degwa.

²¹ Sa mehō lo-e! Nabē hil ayod su nanēr hil nabē hil nehevong ngaa nipaya rē, og hil su agöneng in Anutu mala. ²² Log ngaa sēn hil neketag in vu yi lo, og nevong vu hil. In hil nesepa loḵ yi horek behil nehevong ngaa yoh vu sēn ahē neving lo.

²³ Log yi horek nebē sēnē: Hil gevong geving Nalu arē nabē yik yi Yesu Kerisi, gehil ahēd geving hil vewen vewen nabē sēn nēr vu hil vorot lo. ²⁴ Nabē mehōti sepa dok Anutu yi horek, og luho Anutu detu timu gAnutu nedo loḵ yi. Lob Anon Vabung sēn Anutu vong vu hil lo tato vu hil behil narak ni bē Anutu nedo loḵ hil ayod.

4

Anutu Yi Anon Vabuung Ga, Memö Lo

¹ Oo sa mehö lo! Alam-gägek-kuungsën ngahisekë denedo yoh vu nyëg vu dob. Nebë saga, om ham su gwevong geving mehönon pin sën denenër bë Anon Vabuung nedo loḵ sir lo. Gaḵ ham seggi ngaa sën nedo loḵ sir lo pin mejaḵ ni rë nabë Anon Vabuung sën neyam vu Anutu lo yönon ma ma. ² Log ham yoh vu bë jaḵ ni nabë Anutu yi Anon Vabuung nedo loḵ mehöti og rëḵ nabë sënë: Alam pin sën denanër nabë Yesu Kerisi tu mehönon raḵ meyam dob lo og Anutu yi Anon Vabuung nedo loḵ sir. ³ Gaḵ alam pin sën su denenër nebë agi rë lo, og ngaa sën nedo loḵ sir lo su yam vu Anutu rë. Gaḵ yam vu mehö sën vongin bë dahun Kerisi na, beham ngo bengö wirek bë rëḵ nam lo. Lob gwëbeng yam ggovek ya benedo dob.

⁴ Oo sa hurmahen lo! Anutu yi ngaa ham, lob ham dahun alam-gägek-kuungsën lo ggovek ya. In Anon Vabuung sën nedo loḵ ham aga kesuu Memö Nipaya sën nedo loḵ alam vu dob agi. ⁵ Alam-gägek-kuungsën sën aga, og denesepa loḵ aggata-dob-yi. Lob hir gägek pin og yik denenër ngaa-dob-yi mu, lob alam sën denesepa loḵ aggata-dob-yi lo denebë nengaj vu ayej. ⁶ Gaḵ hileḵ Anutu yi ngaa hil. Om mehöti sën nerak Anutu ni lo, og nebë nenga vu hil gägek. Gaḵ mehöti sën su Anutu yi mehö yi rë lo, og su nebë nenga vu hil ayed rë. Yik hil ngo rëḵ ajaḵ Anon Vabuung gägek-anon-yi ni, gajaḵ memö gägek-kuungsën-yi ni jaḵ ngaa nabë sënë.

Ahëvingsën Degwa Sogek Anutu

⁷ Oo sa mehö lo! Hil pasang ahëd geving hil vewen vewen. In sën hil ahëd geving alam lo, og degwa vu Anutu. Om mehö sën nesepa loḵ aggata-ahëvingsën-yi lo, og Anutu nalu yi beneraḵ Anutu ni yönon. ⁸ Gaḵ mehö sën su ahë neving ari lo rë lo, og yi dugin Anutu, in ahëvingsën degwaseḵe Anutu. ⁹ Anutu yiḵ nalu perurek timu nedo, lob vong luḵ yam dob in bë doḵ vu hil behil medo malad-tumsën jaḵ yi. Lob sënë tato vu hil bë Anutu ahë neving hil. ¹⁰ Ahëvingsën degwa nebë sënë: Anutu su ahë neving hil in hil ahëd neving yi mugin rë. Gaḵ yö ahë neving hil mugin bevong Nalu luḵ yam dob in bë natu seriveng doḵ nah hil bed, bekevoh hil ngaa nipaya na.

¹¹ Oo sa mehö lo! Ngaa sënë tato vu hil bë Anutu ahë neving hil pangsën rot, om yiḵ hil gevong nabë saga behil ngo ahëd geving hil vewen vewen. ¹² Mehöti su mala raḵ Anutu rë. Rëḵ mu nabë hil ahëd geving hil vewen vewen, og Anutu rëḵ medo doḵ hil ayod, lob mëm hil rëḵ ahëd geving hil niröp rot nabë sën Anutu ahë neving hil lo. ¹³ Vo yö yi Anon Vabuung vu hil, lob hil naraḵ ni raḵ sënë bë hil los Anutu atu timu, genedo loḵ hil ayod. ¹⁴ He halë raḵ malamin bë Ama vong Nalu luḵ yam dob in bë geḵo alam vu dob nah vu yi, om sën he nanër gagek sënë rangah. ¹⁵ Nabë mehöti nanër rangah nabë Yesu sënëḵ Anutu Nalu, og Anutu nedo loḵ mehö saga, geluho mehö saga detu timu.

¹⁶ Lob hil araḵ ni benehevong ving bë Anutu ahë neving hil. Ahëvingsën degwaseḵe Anutu, log mehöti sën nesepa loḵ aggata-ahëvingsën-yi lo,

og luho Anutu detu timu gAnutu nedo loḵ ayo. ¹⁷ Nabë hil medo dob sënë begevong ngaa nabë Kerisi, og hil arax ni bë hil nesepa loḵ aggata-ahëvingsën-yi niröp rot. Om hil su rëḵ agöneng in buk böpata sën nyëvewen-yi lo rë. ¹⁸ Nabë hil ahëd geving yönon, og hil su rëḵ agöneng rë. Yönon, nabë hil sepa doḵ aggata-ahëvingsën-yi niröp rot, og saga rëḵ juuk ggönengsën na. Ggönengsën degwa nebë mehönnon kwaj nevo bë rëḵ denatöḵ jaḵ hir ngaa nipaya nyëvewen. Om nabë mehöti nähën neggöneng, og hil narak ni bë su nesepa loḵ aggata-ahëvingsën-yi niröp rot rë. ¹⁹ Ahëvingsën neggëp vu hil in degwa rak sën Anutu yö ahë ving hil mugin lo. ²⁰ Nabë mehöti nanër nabë ahë neving Anutu, loḵ hil halë bë nelë ari paya, og mehö saga yö kuung rak. In lë ari rak mala rëḵ su ahë neving yi rë, om su yoh vu bë rëḵ ahë geving Anutu sën su lë rak mala rë lo. ²¹ In hil haḵo horek sënë vu Kerisi bë: Mehöti sën ahë neving Anutu lo, og yix ahë geving ari lo geving nabë saga.

5

Alam Sën Denevong Ving Lo, Og Denedahun Ngaa-dob-yi Ya

¹ Alam sën denevong ving Yesu bë yi mehö sën Anutu ggoin rak in bë geḵo hil nah lo, og alam saga detu Anutu nalu. Log alam sën ahëj neving Anutu lo, og ahëj neving nalu lo pin ving. ² Om nabë hil ahëd geving Anutu besepa doḵ yi horek, og saga tato vu hil bë hil ahëd neving Anutu nalu lo ving. ³ Bë hil ahëd neving Anutu, og hil rëḵ sepa doḵ yi horek, lob yi horek su rëḵ maggin vu hil

rë. ⁴ In alam pin sën denetu Anutu nalu lo, og denevuu ngaa-dob-yi ya. Log sën yik hil ayod neya timu vu Kerisi lo og vong behil hevuu ngaa-dob-yi ya gehil nare nidwëek. ⁵ Mehö nebë tena nevuu aggata-dob-yi ya genare niwëek-a? Gaḵ yik mehö sën nevong ving Yesu bë Anutu Nalu lo.

Anutu Nër Nalu Yi Gagek Rangah

⁶ Yik Yesu Kerisi sënë sën yam los bël-ripeksën-yi lo, geyam in bë keseh kök jak kelepeko*. Su bël mu tatekin yi rangah rë, gaḵ bël los kök detatekin yi rangah loḵ ti. Lob Anon Vabuung tatekin gagek raḵ Kerisi ving, in Anon Vabuung og mehö gagek-anon-yi. ⁷ Sir löö sënë denetatekin yi rangah: ⁸ Anon Vabuung, gebël, gekök, lob yik lööhoho denenër gagek neggëp ti. ⁹ Hil nehango gagek sën mehönon denenër vu hil lo benehevong ving, rëḵ mu gagek sën Anutu nenër lo kesuu gagek sën mehönon denenër agi. Lob gagek sën Anutu nër agi, og yik gagek sën netatekin Nalu rangah lo. ¹⁰ Mehöti sën ayo neya timu vu Anutu Nalu lo, og raḵ ni loḵ ayo bë gagek sën Anutu nër agi og yönon. Gaḵ mehöti sën su ayo neya timu vu Anutu rë lo, og sagaḵ nenër bë Anutu mehö gagek-kuungsën. In su nevong ving Anutu Nalu yi gagek anon sën Anutu yö tatekin rangah lo rë. ¹¹ Gagek anon sën Anutu nër agi nebë: Anutu vo mala-tumsën degwata los degwata vu hil, degwa raḵ Nalu. ¹² Mehöti sën yö negga raḵ Anutu Nalu rot lo, og mala-tumsën neggëp vu yi. Gaḵ mehöti sën nedo ading in Anutu Nalu lo, og mala-tumsën sënë su neggëp vu yi rë.

Hil Ajak Ni Nabë Hil Rëk Medo Malad-tumsën Degwata

¹³ Sa kevu gagek sënë yök vu ham, in bë ham sën ham nevong ving Anutu Nalu arë lo jak ni borot nabë ham ço mala-tumsën degwata los degwata yök vu ham ggovek ya. ¹⁴ Bë hil ketag ngaa ti vu Anutu, og hil su agöneng in yi, in hil narak ni vorot bë: Nabë hil ketag noh vu sën kwa nevo lo, og rëk gebë nenga vu hil. ¹⁵ Yönon, hil arak ni vorot bë nebë nenga vu hil in ngaa pin sën hil neketag vu yi in lo, om hil ajak sënë ni geving nabë vong ngaa sën hil ketag in vu yi lo vu hil ggovek ya. ¹⁶ Bë mehöti lë gari vong ngaa nipaya ti, rëk mu ngaa nipaya sënë su yoh vu bë gevong bari sënë na mala nama dok Nyëg Nipaya rë, og najom jak vu Anutu in yi, lob Anutu rëk gevong bemedo mala-tumsën. Yik senër alam sën denevong ngaa nipaya sën su yoh vu bë gevong bemalaj nama dok Nyëg Nipaya rë lo. Gak ngaa nipaya sën rëk gevong bemehönon malaj nama dok Nyëg Nipaya lo, og sa su nër rak saga bë ham kwetag in rë. ¹⁷ Ngaa pin sën su neyoh vu rë lo, og sagak ngaa nipaya pin. Rëk ngaa nipaya vahi og su nevong bemehönon malaj nema verök yi lok Nyëg Nipaya rë. ¹⁸ Hil arak ni bë alam pin sën detu Anutu nalu lo, og su denesepa lok ngaa nipaya rë. Gak Anutu Nalu nemalain sir nivesa, om Satan su yoh vu bë gebë nema jak sir rë. ¹⁹ Hil narak ni bë hil atu Anutu nalu lo, gak Satan tu mehönon sën denesepa lok aggata-dob-yi lo pin alaj. ²⁰ Hil arak ni bë Anutu Nalu yam ggovek ya, lob tatekin hil kwad in bë hil ajak Anutu sogek ni rot. Lob hil los Anutu sogek atu timu, in hil los Nalu Yesu Kerisi atu timu ggovek ya. In Nalu og

yik yi Anutu sogek, bemala-tumsën degwa neggëp
degwata los degwata vu yi.

²¹ Oo sa hurmahen lo! Ham gwegin ham vu
anutu-kuungsën.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023

18a972db-abcc-5dc3-9031-f1d4455b33c3